



UKA 2017/135

19/10-2017

Randi Vestergaard Evaldsen

**Siunnersuut uunga: Kalaallit Nunatta pigisaannik aningaaserivimmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piumasaqaatit arimaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut.**

(Inatsisartunut ilaasortaq Anthon Frederiksen, Partii Naleraq)

(Siullermeerneqarnera)

Demokraatini siornatigut oqaatigereerparput - aamma uteqqikutsoorsinnaavarput.

Namminersorlutik Oqartussat sullivimmik ingerlatsissanngillat aamma aningaaseriviugaluarpalluunniit. Isumaqaarpugut innuttaasut namminneq aalajangissagaat sorleq aningaaserivittut atorumanerlugu.

Uanga soorlu nammineq toqqarnikuuara GrønlandsBANKEN, nalunngisamma amerlaqisut Bank Nordik atorpaat aamma allat ilisarimasama aningaaseriviit allat atorpaat. Inuttut aningaasaqassuseq apeqqutaasarpoq, pisariaqartitat taamatullu piumasaqaatit isumaqatigiissutillu.

Partii Naleqqap matumangga siunnersuuteqarnermigut aalajangerniarsaraa Namminersorlutik Oqartussat aningaaseriviteqalissasut ingerlatassaminnik. Naatsorsuutigaara Partii Naleqqap allat aningaaserivimmik ingerlatserusuttut unitsinniannngikkat, taamaattoqassappammi pisortat namminersortunut unammillilissapput. Kinguneranik pisortat ingerlatsivii anginerulissapput namminersortullu minnerulerlutik. Tamanna isumaqanngilaq. Atagu Namminersorlutik Oqartussanut sulissutigiteriartigu Namminersorluni Oqartussaanerup iluatsinnissaa. Namminersorlutik Oqartussat suliakkersorniarunnaalaariartigit namminersortut namminneq ingerlalluarsinnaasaannik.

Aningaaseriviit maannakkut ingerlasut aningaaserivimmik ingerlatsinermut immikkut ilisimasaqartuupput. Uanga nammineq siunnersortikkusunneruvunga immikkut ilisimasalimmik misilittagaqarluartumillu assersuutigalugu aningaasanik taarsigassarsiniartillunga.

Namminersorlutik Oqartussat aningaaserivimmik ingerlatsileriataassagaluarpata taava pisortat allaffissornerat ingalluni allissaq aamma nalunngilara aningaaserivimmi sulilerumaartussat ilaatigut tikisitaajumaartut, nunami maani amingaatigigatsigit inatsisilerituut, aningaasarsiornermut immikkut ilisimasallit il.il. Imaanngilaq tikisitat ajorigatsigit - tikilluaqqunartaqaat pisariaqarlutillumi - oqaatiginialaaginnarlugu siunnersuuteqartup partiiata tunngaviummik anguniangarimmagu tikisitanik sulisusarsiniartoqartassanngitsoq.



Ataqatigiinngillat. Kissaatigaarput inuit namminneq kiffaangissuseqarlutik aningaaserissaminnik toqqaasinnaassasut aamma politikkikkut aalajangersarneqassanngilaq innuttaasut aningaaserivinnik sorlernik atuissanersut.

Taamatulli oqareerluta aamma pingaaruteqarpoq eqqaassallugu Partii Naleqqap nammineq imaluunniit allat kalaallinik taamaallaat pigineqartumik aningaaserivimmik ammaanissaat ajornangimmat. Taamaaliorusukkussi takannarujussuaq. Inuinnaalli aningaasaataat atortariaqarput aammlua aningaaseriviit pioreersut unammillerlugit.

Siunnersuutip itigartinneqarnissaa inassutigaarput.